

DOMINGO 24° DURANTE EL AÑO



MAITEI ÓUVAPE – SALUDO

Py'a porãme ñañembyaty che irũnguéra. Ñandejára niko upe ñane renóiva imba'e porãgui. Hesarái ha omboguepa ñande rapykuere ha ome'ẽ ñandéve peteĩ tekove pyahu oñondive.

Ñamomba'e guasu ichupe ha ñañopytyvõ mborayhu pópe.

ÑEMBO'E ÑEPYRÜ

Ñandejára ore Ru ha opa mba'e Jára, ema'ẽkena ore rehe, ha eheja toroiko nde rembijokuáiramo ore py'aite guive, roñandukuaa haguã umi mba'e porã ne mborayhúgui oúva.

Nde Ra'y Hesukrísto rupive, Tupã Ñandejaraite, oikovéva ha ipu'akapáva nendive Espíritu Sánto ñemopeteĩme, yma, ko'ága ha opa araité.

ÑAHENDU ÑANDEJÁRAPE – MOTIVACIÓN A LECTURAS.

Heta jadeve ñande patrón guasúpe ha ha'e ñañande kovrái, ñaneperdona ha ipasiénsia ñande rehe.

Upéicha avei ñande ñane pasiénsia vajerã ñande rapicha ofalláva ndive, he'i Hesu. Eclesiástico kuatiápe oje'e ñandéve pe pochy ha py'aro ñanembyai.

Ndaikatúi jajerure Ñandejárape ñaneperdona haguã, ñande ñañaperdonáiramo ñande rapichápe. San Pablo he'i opa ára, jeikove ha ñemanóme, ñaime Ñandejára pópe.

LECTURA PETEÏHA:

KO'ÁGÄ ÑAHENDÚTA TUPÄ ÑANDEJÁRA ÑE'Ë ECLESIASTICO ARANDUKÁPE OÏ HÁICHA

27,30 _ 28,7

Py'aro ha pochy vai, mba'e jahechase'ỹva, hembiaipo vaíva rehe oja hína umíva.

Avavépe oheja rei'ỹva mba'eve, upévape Ñandejára mba'eve ndoheja rei mo'ãi, oipapáta opa iñangaipa.

Eheja rei nde rapichápe ijevavykue, reipota ramo Ñandejáraoheja rei ndéve.

Mba'éicha piko oha'arõta Ñandejáragui tesãi ipy'aróva hapicha ndive.

Ha'eichaguápe ndoiporiahuverekói, ha piko ojeruréta Ñandejárape poriahuvereko. Ha'e omano va'erãnte avei ha ipy'aro hapicha ndive, máva piko ojeruréta hese ojeheja rei haguã ichupe iñangaipa.

Ejepya mongeta remano rire guarãre ha epoi py'a rógui, ne mandu'a remano ha nde tujutaha, ha ejapo Ñandejára rembiapoukapy. Ne mandu'a hembiaipoukapyre, ha ani nde py'aro.

Tupã Ñandejára Ñe'ë.

Opavave: Romomba'e guasu ndéve, Ñandejára.

SALMO ÑEMBOHOVÁI 102,1-4. 9-12

OPAVAVE: ÑANDEJÁRA IMBA'E PORÃ HA ÑANDE PORIAHUVEREKO.

Amomba'e guasu Ñandejárape che py'aite guive, che py'aite guive amomba'e guasu héra marangatu. Amomba'e guasu Ñandejárape che py'aite guive, nda che resarái chéne heta mba'e porã ome'ẽ hague chéve. **O.**

Ha'e oheja rei chéve che rembiapo vaikue ha che mongueráva opaichagua mba'asýgui. Ha'e ndohejái apa yvy kuápe ha mborayhúpe che aña ha che mokunu'ũ. **O.**

Ha'e ndoporomongavajúi mante ha nda ipochy aréi. Nomyengovíai ñandéve ñane angaipa, nomyengovíai ñandéve ñane rembiapo vaikue. **O.**

Yvága oĩ mombyry háicha yvýgui, upeichaite tuicha imborayhu umi hese ojerovíava rehe. Kuarahy resẽ mombyryháicha kuarahy reikégui, upéicha omomombyry ñande hegui ñane angaipa. **O.**

LECTURA MOKÖIHA:

ÑAHENDÚTA TUPÄ ÑANDEJÁRA ÑE'Ë SAN PABLO OHAI VA'EKUE ROMA GUÁPE 14, 7-9

Avave ndajaikovéi ñande jupe guarã, ha nañamanói ñande jupe guarã. Jaikove ramo, jaikove Ñandejárape guarã, ha ñamano ramo, Ñandejárape guarã ñamano.

Ha upéicha, jaikove ramo ha ñamano ramo, Ñandejára mba'e ñande. Upevarã omano Cristo ha oikove jevy, ha'e haguã, omanóva ha oikovéva Jára.

Tupä Ñandejára Ñe'ë.

Opavave: Romomba'e guasu ndéve, Ñandejára.

ALELUIA JN 13, 34

Aleluia.

Ko mandamiénto ipyahúva aheja peëme: Pejoayhukena. Che pohayhu haguéicha pejoayhu avei peë.

Aleluia.

EVANGELIO

MARANDU PORÃ ÑANDEJÁRA HESUKRÍSTO REHEGUA SAN MATEO OMOMBE'U HÁICHA 18,21-35

OPAVAVE: ROMOMBA'E GUASU NDÉVE, ÑANDEJÁRA.

Upérõ Pedro oñemboja Jesús rendápe ha he'i chupe: — Maestro, oime ramo hembiaipo vaíva che ndive piko mboy vése aheja rei vaerã chupe. 7 piko iporãma.

Jesús katu he'i chupe: — Nahániri. Ndaha'etí 7, 77 jo'a jo'a uvei.

Kóa ko káso ohechaukáta peëme mba'éichatapa hína Ñandejára Rréino.

Oiko vajekue ndaje raka'e peteĩ mburuvicha oikuaaséva mboy-mboýpa odeve chupe umi omba'apóva chupe.

Iñepyrũme voi, ojeguero hendápe peteĩ hetaiterei rasa odevéva chupe. Ha isoguégui, ndaikatu mo'ãiva omyengovia mba'eve.

Huvicha upémarõ he'i ovendetaha chupe tembiguái ramo ta'yrakuéra ha hembireko ave, ha upéva ári opa mba'e oguerekóva.

Pe hepykue opytáta chupe upe oiporu va'ekue rekovia. Upépe, pe kuimba'e oñesũ huvicha renondépe ha ojerure asy chupe: “Che ruvicha, ndikatúi piko che ra'arõ'imive.

Amyengoviáta niko ndéve pe aiporu vaekue.” Ha huvicha oiporiahuvereko chupe. Oheja rei chupe pe odevéva, ha oheja oho. Ha ha'e osẽvo okápe katu, ojuhu hapichápe oiporu vaekue chugui pláta michĩ ra'yimi.

Opo voi hese ha oityvyro chupe, he'ivo: “Emyengovia chéve pe redevéva.” Hapicha oñesũ henondépe ha ojerure asy chupe: “Ndikatúi piko che ra'arõ'imive. Amyengoviáta niko ndéve pe aiporu va'ekue” Ha'e katu ndoikuaaséi chugui mba'eve.

Oguerahauka préso omyengoviapa peve pe oiporu vajekue. Umi hapicha ohechávo upéva, ipochypa. Oho hikuái mburuvicha rendápe ha omombe'u chupe mba'épa ojehu.

Upémarõ pe mburuvicha ohenoika pe kuimba'épe ha he'i chupe: “Ne aña ra'y reikóva. Che niko aheja rei ndéve pe ikatu'ỹ va'ekue remyengovia chéve, rejerure haguére.

Mba'éicha piko nde, nderehecha kuaái nde rapichápe, che ajapo haguéicha ne ndive.”

Ha pe mburuvicha ipochy'eterei opytávo. Upémarõ ombyepotiuka omyengoviapa peve upe chupe odevéva.

Upéi Jesús osẽ he'i: — Péicha avei ojapóta pende rehe che ru yvágape oíva pende py'aite guive ndapeheja reíri ramo pende rapichápe pe ivaíva ojapóva pende rehe.

Tupä Ñandejára Ñe'ë

Opavave: Romomba'e guasu ndéve, Ñandejára Hesuskrísto.

JAJERURE ÑANDEJÁRAPE—PETICIONES

He'i ñandéve Hesu: “Mokõi peñemoĩ ramo peteĩ ñe'ëme pejerurévo oimeraẽ mba'e che Ru yvágape oívape, ha'e ome'ẽ va'erã peëme”.

Jajerure katu upéicha ramo ñande Rúpe oñondive:

OPAVAVE: ORE RENDUMIKENA ÑANDEJÁRA.

1. Ñadefende ha ñanerakate'ỹ haguã opaite mitã rekovére. Anivéma oime ojejúkáva, ojeporu ha oñemoingéva tembiapo vaípe. **Rojerure ndéve Ñandejára.**

2. Mitãkuña ha mitãkuimba'ekuéra rehe. TohenduÑandejára ñehenói, osẽ haguã ijapytégui pa'i ha hermanarã, Katekísta, celebrador. **Rojerure ndéve Ñandejára.**

3. Sy ha túvakuéra rehe, opytáva tembiapo'ýre, ndohupytyva oikotevéva ifamília peguarã. Oime haguã omoirũ ha oipytyvõva. **Rojerure ndéve Ñandejára.**

4. Ñande aguélokuéra rehe, umi ha'eño ha hasýva rehe. Ani haguã ñamboýke ha opyta tesaráipe. Ñambojere ha ñama'ẽ haguã hesekuéra. **Rojerure ndéve Ñandejára.**

- Ikatu ñambojoapyve ñane ñembo'e.

Ñandejára ore ru, roju niko oñondive rojerure ndéve roikotevéva, he'i haguéicha oréve nde ra'y Ñandejára Hesukrísto.

Ehendumíkена py'a porãme ore ñembo'e. Amén.

ÑEMBO'E OFRENDA REHEGUA

Tupã Ñandejára, ehendúkena ore ñembo'e, ha eguero'hory nde Iglésia kuave'ẽmby, ikatu haguäicha ko'ä roikuave'eva nde rérape ohupytyka pysyrõ opavavépe.

Ñandejára Hesukrísto rupive.

PREFACIO COMÚN II: SALVACIÓN ÑANDEJARA HESUKRISTO RUPIVE

P. Ñandejára toĩ penendive
O. Ha nendive avei.

P. Ñamopu'ãkena ñane ánga
O. Romopu'ãma voi Ñandejára gotyo.

P. Jaaguyjeveme'ẽ Tupã Ñandejárape
O. Iporã ha tekotevẽ.

Añetehápe iporã ha tekotevẽ, ore rembiaporã voĩnte ha ore pysyrõ roaguyjeveme'ẽ ndéve opárupi ha tapiáite,

Ñandejára, ore Ruarangatu, Tupã nde pu'akapáva ha opa ára reikovéva.

Nde rejapova'ekue yvypórape rehayhúgui ichupe, ha ipo rupi oñehundi ramo jepe, reiporiahuverekógui eipysyrõ ichupe, Ñandejára, Jesucristo rupive.

Ha'e rupi, umi ánhelkuéra oguero'hory ne ñemomba'e guasu, ne renondépe oñesu tendotakuéra ha ipirĩmba umi sambyhyhára.

Yvágape katu nde guero'hory vy'apópe yvagapeguakuéra ha umi serafínarangatu avei.

Ehejamíkена oréve toromoirũmi chupekuéra, Ropurahéivo ñemomirime nde jerero'hory:

Imarangatu,
Imarangatu, Imarangatu Ñandejára,
Tupã Opa Mba'e Jára.

Henyhẽ yvy ha yvága nde rekove mimbipágui. Osánna yvágape. Jehovasapyre pe oúva Tupã Ñandejára rérape.

Osánna yvágape

ÑEMBO'E COMUNIÓN RIRE

Tupã Ñandejára, rojerure ndéve, ko tembi'u yvága pegua ehupytykáva oréve tojehe'a ore ánga ha ore rete rehe, ikatu haguäicha umi tembiapo ani rojapo ore pu'akápente torojapo uvei ko techapyrãarangatu pu'aka rupi.

Ñandejára Hesukrísto rupive.

JAHAKUÉVO - DESPEDIDA.


Py'aguapýpe ñamohu'ã ñane ñembo'e che hermanokuéra. Ñandejára py'a porã topyta ñande pype ha toike ñande rogapýpe.



Ñandejára ombovevúi háicha ñandéve ñande rekove, ñañeha'ã avei ñambovevúi ojupe ñande rape ko mba'asy vai ñande jopy aja.




CON EL AVAL DE:



 0981 615 628

  @misaguarani

 misaguaranipy@gmail.com